



Stručna služba općinskog vijeća i općinskog načelnika

Broj: 01/1-02-620/19  
Ilijaš, 27.03.2019. godine

**PRIJEDLOG**

**ZAPISNIK**

sa 29. (dvadesetdevete) sjednice Općinskog vijeća Ilijaš, održane dana 27.03.2019. godine, sa početkom u 10:00h.

Dvadesetdevetom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	MIRZA BEKTIĆ
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	-
13	ALEN HASKOVIĆ
14	SEAD ŠEHIĆ
	<b>SDP</b>
15	ALAN ŠERAK
16	ELDAR ŠEHIĆ
17	MIRSAD OSMANOVIĆ
	<b>SBB-FAHRUDIN RADONČIĆ</b>
18	AKIF BEŠLIJA
	<b>BPS-SEFER HALILOVIĆ</b>
19	MUHAMED HANDŽIĆ
20	ALMIR ŠPIODIĆ
	<b>GS</b>
21	-
22	ASIM MUJIĆ
	<b>SAMOSTALNI VIJEĆNICI</b>
23	SEMIR DIZDAREVIĆ
24	BESIM GLJIVA
	<b>LDS</b>
25	MEHO DŽINDO

Odsutni vijećnici:

1. Melisa Matoruga i
2. Edhem Hasanović

Prisutni gosti:

1. TV Vogošća
2. TV SA
3. Radio Ilijaš – Nermina Durić-Kahvedžić
4. Benis Fazlić – direktor JU “KSC i Radio Ilijaš”
5. Mehmed Smajlović – predsjednik savjeta MZ Mrakovo
6. Mirsad Hamzić – predsjednik Savjeta MZ Malešići
7. Alen Matoruga – predsjednik Savjeta MZ Misoča
8. Volonter: Nedim Balta

Ostali prisutni:

1. Akif Fazlić – općinski načelnik
2. Sadeta Brkić – pomoćnik načelnika
3. Nijaz Spahić – pomoćnik načelnika
4. Zdravko Barić – pomoćnik načelnika
5. Aziz Fazlić – pomoćnik načelnika
6. Merima Osmanović – pomoćnik načelnika
7. Ilda Kahriman – sekretar OV-a Ilijaš
8. Nermina Lemezan - stručni saradnik za informisanje
9. Enisa Mešetović – stručni suradnik sa obrazovanje i pitanja mladih i NVO sektor
10. Đenan Suša – IT administrator
11. Maida Habibović – zapisničar.

ALMA OMEROVIĆ – predsjedavajuća

Otvorila je sjednicu i konstatovala da su prisutna 23 vijećnika, te da postoji kvorum za odlučivanje.

Zatim je dala na razmatranje zapisnik sa 28. sjednice OV-a.

Primjedbi na zapisnik nije bilo, pa je OV-e većinom glasova usvojilo zapisnik sa 29. sjednice OV-a.

Pročitala je predloženi dnevni red i dala na razmatranje.

AKIF FAZLIĆ – općinski načelnik

Predložio je da se tačka 6. Prijedlog Odluke o privremenom korištenju javnih površina na području općine Ilijaš razmatra kao Nacrt Odluke o privremenom korištenju javnih površina na području općine Ilijaš.

Primjedbi i prijedloga za izmjenu dnevnog reda više nie bilo, pa je OV-e jednoglasno usvojilo sljedeći

## **DNEVNI RED**

1. Vijećnička pitanja i inicijative
2. Izvještaj o realizaciji zaključaka sa 28. sjednice

3. Prijedlog Zaključka kojim se usvaja Izvještaj o radu i finansijskom poslovanju za 2018. godinu Javne ustanove "Kulturno-sportski centar i Radio Ilijaš"
4. Prijedlog Odluke o davanju saglasnosti na Plan rada Javne ustanove "Kulturno-sportski centar i Radio Ilijaš" za 2019. godinu
5. Prijedlog Odluke o naknadama za izdavanje izvoda iz Adresnog registra
6. Nacrt Odluke o privremenom korištenju javnih površina na području Općine Ilijaš
7. Prijedlog Odluke o načinima i uslovima prodaje neizgrađenog građevinskog zemljišta (Alića Gaj)
8. Prijedlog Rješenja iz imovinsko-pravne oblasti broj:06/1-31-407/19
9. Informacija o dodjeli općinskih stipendija za učenike i studente u školskoj 2018/2019. godini.

AD-1

Vijećnička pitanja i inicijative

HALID DIZDAREVIĆ – vijećnik SDA

Inicijativa:

Pokrećem inicijativu da nadležna služba izvrši uvid u stanje dječijeg igrališta, stanja sportskih rekvizita na istom i da se izvrši sanacija sportskih rekvizita. Predlažem da se postavi video nadzor i da se spoji na postojeći video nadzor u cilju sprječavanja uništenja istih.

MEHMED SINANOVIĆ – vijećnik SDA

Inicijativa:

Pokrećem inicijativu prema MUP-u Kantona Sarajevo da se na regionalnom putu u naselju Lješevo postavi stacionarni radar.

Nakon obnove i rekonstrukcije pomenutog regionalnog puta u naselju Lješevo, te zbog pravca na istom, vozači se često ne pridržavaju brzine, čime ugrožavaju ostale učesnike u saobraćaju, te zbog toga pokrećem ovu inicijativu.

MIRZA BEKTIĆ – vijećnik SDA

Inicijative:

1. Pokrećem inicijativu prema Direkciji za ceste Kantona Sarajevo za postavljanje usporivača brzine u naselju Kadarići.  
Prilikom otvaranja dionice Kadarići-Ljubnići, došlo je do povećanja prometa motornih vozila na navedenoj dionici. Obzirom da se radi o pravcu dužine cca 500 m većina vozača svoju brzinu ne prilagođava naseljenom području, a na navedenoj dionici gravitira veliki broj djece većinom školskog uzrasta.
2. Pokrećem inicijativu za uređenje prilaza mostu u Kadarićima.  
Na pomenutoj lokaciji kod mosta u Kadarićima dolazi do nepropisnog odlaganja otpada (kabasti, animalni i građevinski). Tražim od nadležne službe da izađe na teren i da utvrdi stanje na toj lokaciji.
3. Pokrećem inicijativu prema JKP "Vodostan" Ilijaš za uređenje puta u Kadarićima.  
U 2018. godini radila se kanalizaciona mreža na potezu od Mali podvožnjak prema

naselju Avdibegovići u dužini cca 400 m. Interesuje me kad je u planu da se desna strana puta vrati u prvobitno stanje?

4. Pokrećem inicijativu za postavljanje zaštitne ograde na mostu u Kadarićima. Smatram da je na mostu u Kadarićima fizička barijera izuzetno niska. Na pomenutoj lokaciji imali smo slučaj gdje je učenika napao pas, učenik je preskočio ogradu mosta i bio je životno ugrožen gdje je doslovno visio na ogradi. Smatram da se treba uraditi kvalitetnija zaštita da ne bi došlo do neželjenih posljedica.
5. Pokrećem inicijativu prema Agenciji za vodno područje rijeke Save za uređenje korita rijeke Bosne.  
Na potezu od mosta u Kadarićima prema Luci postoji određeni broj stambenih jedinica koji su pri najmanjem povećanju vodostaja rijeke Bosne ugrožene, građanima voda ulazi u stambene jedinice. Da li je u planu i kada, uređenje ovog dijela rijeke Bosne?

BESIM GLJIVA – samostalni vijećnik

Pitanje:

Zašto već godinu i više dana Dom zdravlja Srednje nema vozilo hitne pomoći, ako već znamo kolikom prostoru gravitira navedeni Dom zdravlja i da na istom živi veliki broj starih i bolesnih lica?

Inicijativa:

Ako se već JU Dom zdravlja Kantona Sarajevo ili Ministarstvo zdravstva Kantona Sarajevo ogluše ponovo na ovaj problem koji traje već 1,5 godinu, pokrećem inicijativu da općina Ilijaš u okviru svojih mogućnosti iz svog Bdžeta obezbijedi dio sredstava za kupovinu navedenog vozila.

SEAD ŠEHIĆ – vijećnik SDA

Pitanje:

Zašto općina Ilijaš nije ispoštovala Odluku Općinskog vijeća Ilijaš od 27.01.2016. godine?

Obrazloženje: Mi smo ovdje dali saglasnost o zaključivanju i potpisivanju Ugovora o prodaji neizgrađenog građevinskog zemljišta na lokaciji Alića Gaj. E sad, evo jedan primjer. Općina Ilijaš daje saglasnost kroz zaključenje Aneksa Ugovora o prodaji da kupac Hošić Rifija nakon što se u zemljišnoj knjizi upiše kao vlasnik predmetnog zemljišta, isto može prenijeti Ugovorom o poklonu u vlasništvo svom sinu Hošić Sakibu. Naravno, gore navedena osoba je imala i neke svoje obaveze, ali i pravo po Aneksu Ugovora da može to što je kupila pokloniti svom sinu. Koliko se sjećam, donijeli smo Odluke koje su bile vrlo jasne i općina se obavezala da će sačiniti Aneksu Ugovora, odnosno načelniku dati saglasnost da to završi. A evo vidimo da već skoro tri godine naši građani ne mogu da ostvare ono što su potpisali u Ugovoru. Naši građani su potpisivali Aneksu Ugovora sa općinom Ilijaš, a ne sa nekim u Sarajevu pa da se od njih traži neka saglasnost i mišljenje. I konačno mi smo ovakvo nešto dobijali na Vijeću i išlo je glatko bez ikakvih problema. Zato molim da mi se odgovori na ovo pitanje. U čemu je problem da gospođa Hošić Rifija, nakon što je kupila regularno zemljište, to isto ne može pokloniti svom sinu Hošić Sakibu. Molim da se da odgovor pozitivan ili negativan, jer stvarno je neozbiljno da se skoro tri godine ovaj predmet razvlači. Uz ovo prilažem i Odluku koja je objavljena u "Službenim

novina Kantona Sarajevo”.

Prilog: Odluka o davanju saglasnosti za zaključivanje i potpisivanje Aneksa Ugovora o prodaji broj:01/1-02-222-9/16 od 28.januara 2016. godine.

RASIM ŠEHIĆ – vijećnik SDA

I ja sam imao pripremljenu inicijativu vezano za vozilo hitne medicinske pomoći za Dom zdravlja u Srednjem, a kolega Besim Gljiva je to dodatno doradio. Ponudio je alternativu koja mi se sviđa i s tim u vezi, ja mislim da nema potrebe da napominjemo koja je važnost toga, koja je teritorija u pitanju. Dosta je preduzeća na tom teritoriju koje se bave rizičnim djelatnostima, a tu je magistralni put M-18. Sa kolegom sam se konsultovao i bilo bi dobro da ovu inicijativu pretvorimo u zaključak. Znači, ukoliko Zavod za hitnu medicinsku pomoć ništa ne poduzme, da postupimo ovako ukoliko ima mogućnosti. Neka se načelnik i službe izjasne u skladu sa onim što smo ranije zaključili. Dakle, Zaključak neka ide i nadležnim službama da, ukoliko ima mogućnosti, Zaključak sprovedu.

MUHAMED HANDŽIĆ – vijećnik BPS-Sefer Halilović

Imam nekoliko pitanja i jednu inicijativu, ali prije toga moram napomenuti da sam dobio odgovor na jednu od mojih prethodnih inicijativa. Naime, radi se o sljedećem: Centar za pružanje komunalnih usluga građanima koji sam tražio prije tri mjeseca, konačno sam dobio odgovor od Ministarstva komunalne privrede koje je nadležno za uspostavljanje ovakvih Centara na Kantonu Sarajevo. Ovdje mi piše da nije planirana Budžetska stavka u te svrhe za ovu godinu i jedno obećanje da će rebalansom Budžeta pokušati da ukomponuju ovaj dio sredstava koji bi bio potreban za uspostavljanje Centra za pružanje komunalnih usluga u općini Ilijaš. Međutim, to sve, po nekoj mojoj procjeni, nije odgovor koji sam ja očekivao. Sličnu inicijativu i pitanje su nekada davno postavljali moje kolege Džindo Meho i Dervišević Muamer. Oni su to meni naveli i dostavili imena vijećnika koji su to nekada tražili. Dakle, da su htjeli i imali volje da nam pomognu i da pomognu građanima općine Ilijaš, ovo Ministarstvo bi to već davno uradilo. S tim u vezi, molim vas kolege vijećnici, načelnika i njegove pomoćnike koji su nadležni, da napravimo jedan Zaključak kojeg ćemo uputiti Ministarstvo komunalne privrede, a koji će se odnositi na uspostavljanje ovog Centra, da nas ne bi opet “preskočili” u obezbjeđivanju sredstava za uspostavljanje istog.

Imam jednu inicijativu, ali prije svega želim da se zahvalim svima onima koji su dali svoje učešće u obilježavanju Dana općine Ilijaš, jer po prvi put nakon prokletog rata, da je nešto u Ilijašu obilježeno dostojanstveno i na jedan vrhunski profesionalni i lijep način. Znači, Organizacionom odboru svaka čast i čestitam na organizaciji obilježavanja Dana općine Ilijaš.

Ali isto tako, u tom smislu i pokrećem sljedeću inicijativu.

Inicijativa:

1. Pokrećem inicijativu da se u povodu dana Armije R BiH (15.04.2019.) formira Organizacioni odbor za obilježavanje istog dana koji bi sačinjavali pomoćnik načelnika za BIZ i predsjednici udruženja proisteklih iz Armije R BiH.

Obrazloženje: Naime, svjedoci smo obilježavanja iz protekle godine kada je to ličilo na sve osim na proslavu dana Armije R BiH. Tog dana je bitno da proslavi prisustvuju borci i njihove porodice, a ne samo političari i ratni profiteri. Također, bitno je da na sjednici

Općinskog vijeća koja je planirana kao svečana sjednica, za govornika imamo nekoga ko je bio istinski borac i patriota, a ne političku ublehu koja će nama koji smo bili sudionici ratnih dešavanja u BiH pričati svoje priče.

Dakle, ono što se napravilo za Dan općine, isto i bolje se može napraviti za obilježavanje Dana Armije R BiH. Dan Armije R BiH je sigurno stariji od Dana općine, jer borci koji su svoje živote ostavljali četiri godine na ovim brdima oko Ilijaša to zaista zaslužuju. Još jednom apelujem na sve one koji slušaju, da tog dana pozovu borce na obilježavanje Dana Armije R BiH i da svečanu sjednicu ne održavamo u ovako skućenom prostoru, nego da se održi u Kino sali KSC-a Ilijaš.

Pitanja:

1. Kada će nadležna općinska inspekcija poduzeti odgovarajuće mjere prema nesavjesnim poljoprivrednim proizvođačima na području općine Ilijaš koji zagađuju okoliš i ugrožavaju zdravlje ljudi odlagajući otpad (stajsko đubrivo) na deponije potoka i rijeka koje protiču kroz našu općinu.

Prilog: slika jednog od tih nesavjesnih proizvođača koji hiljade tona đubriva ispušta u potok i uništava živote ljudi koji nizvodno stanuju.

Molim inspektora koji se bude obraćao ovim osobama i ovim vlasnicima poljoprivrednih gazdinstava neka opet kaže da ih je prijavio Muhamed Handžić, vijećnik u Općinskom vijeću, i da on nije prijavio mi vam ne bi došli. Ja ću ih prijavljivati sve dok ne stvore uslove i po Zakonu ne budu deponovali svoj otpad. Nama je interes da nam svaki radnik bude zaposlen, da svaki građanin Ilijaša bude zaštićen, ali prije svega, najveći interes nam je zdravlje ljudi.

2. Tražim da mi JKP "Vodostan" Ilijaš dostavi podatke koliko je radnika u navedenom preduzeću zaposleno u periodu od 2013. do 2019. godine po sljedećim elementima:
  - ime, prezime i godina rođenja uposlenika;
  - stručna sprema i zanimanje;
  - na koje radno mjesto je primljen/a i
  - uslovi prijema (određeno ili neodređeno).

Dakle, po ovim elementima želim odgovor. Zašto? Po kuolarima se priča, do nas vijećnika dopire i ponižavaju nas građani s pravom da se tamo po preporukama zapošljava gimnazijalac na mjesto vodoinstalatera ili sl. neki društveni smjerovi na mjesto zanatlije. Hoćemo da imamo uvid u to i sve odgovore koje dobijem, ja ću pročitati ovdje da ljudi čuju. Radio Ilijaš molim da se više nikada ne upuštate u to da reducirate moje govore koje kažem na ovom Vijeću kao što radite. Kada bude došao na red Izvještaj JU "KSC i Radio Ilijaš", ja ću to reći direktoru. Znači, to ne smijete raditi, to je uskraćivanje medijskog prostora meni i zbog toga možete dobiti i tužbu. Znači nemojte to raditi sa sjednica Općinskog vijeća, pustite sjednicu neka ide kako ide i onoliko ljudi koliko vas sluša neka čuje, a ne da radite po svom.

3. Kada će nadležne firme koje su vršile zimsko održavanje puteva izvršiti čišćenje kanala i posipnog materijala sa puteva? Obzirom da je završena sezona zimskog održavanja već 15.marta, očekujemo da se to desi u okviru ovog mjeseca.

## ALLEN HASKOVIĆ – vijećnik SDA

### Inicijativa:

1. Pokrećem inicijativu da nadležna općinska služba napravi plan parcelizacije ukupa na mezarju u Ljubničima, te da se isti počne primjenjivati čim prije, jer do sada nije poštovan nikakav plan ukopa umrlih.

## ANEL BUMBULOVIĆ – vijećnik SDA

### Inicijativa:

Ponovo pokrećem inicijativu prema Direkciji za ceste Kantona Sarajevo da se u Podlugovima na dionici puta između pružnog prelaza i raskrsnice za Brezu, izvrši postavljanje horizontalnih usporivača saobraćaja, te adekvatna vertikalna saobraćajna signalizacija.

Obrazloženje: Na jednoj od prethodnih sjednica u toku 2018. godine sam pokrenuo istu inicijativu, ali na pomenutu nisam dobio adekvatan odgovor niti je došlo do realizacije iste. Treba spomenuti da navedenu dionicu puta svakodnevno koristi veliki broj učenika OŠ "Podlugovi" koji dolaze iz naselja INA, Ljubnići i ul.Obala Bosne.

## ALMIR ŠPIODIĆ – vijećnik BPS-Sefer Halilović

Na pošloj sjednici sam postavio dva pitanja i jednu inicijativu. Na jedno pitanje sam dobio odgovor da je pitanje prosljeđeno nadležnom Ministarstvu za saobraćaj Kantona Sarajevo, Željeznicama F BiH i Direkciji za puteve Kantona Sarajevo. Međutim, za drugo pitanje koje se odnosilo na Telemach da li posjeduju odgovarajuću građevinsku dozvolu za korištenje javne površine puteva u mjesnim zajednicama u kojima su postavili svoje stubove, nisam dobio nikakav odgovor, niti da je urađeno bilo šta po tom pitanju.

Također, za inicijativu koja se odnosi na prosijecanje javnih površina, puteva u užem jezgru grada Ilijaša gdje sam insistirao da inspektor izvrši nadzor i izvrše pritisak na izvođače radova da vrate u prvobitno stanje, nisam dobio nikakvu uputu da je dostavljeno nadležnim općinskim službama. Smatram da je možda došlo do greške i da nije niko namjerno izostavio proslijediti pitanje i inicijativu.

Iskoristit ću priliku da ponovo postavim isto pitanje i pokrenem istu inicijativu.

### Pitanje:

Ima li kompanija Telemach građevinsku dozvolu za postavljene stubove koji nose kablove putem koji se prenosi signal TV i interneta?

Na području Mjesne zajednice Podlugovi na više mjesta u ul.Polomska, Vratuša i Sovrle nalaze se stubovi koji nose kablove preko kojih kompanija Telemach vrši usluge isporuke TV signala i interneta. Stubovi su postavljeni u samom putu i ugrožavaju kretanje učesnika u saobraćaju. Mene interesuje da li pomenuta kompanija ima odgovarajuće dozvole za postavljanje objekata u putu? Ovo nije samo slučaj u Podlugovima, slična situacija je i u drugim mjesnim zajednicama. Ukoliko kompanija ne posjeduje odgovarajuće dozvole, predlažem nadležnoj općinskoj službi da pokrene postupak legalizacije s ciljem naplate korištenja javnog zemljišta ili uklanjanje objekata sa javne površine. Zavisno od odgovora koji dobijem, pokrenut ću i jednu inicijativu na sljedećoj sjednici Vijeća u vezi ovog pitanja.

Inicijativa:

Pokrećem inicijativu nadležnoj općinskoj službi i građevinskom inspektoratu da izvrše nadzor i pritisak na izvođače radova koji su na više mjesta u užem jezgru grada Ilijaša izvršili prokopavanje javnih površina, a nisu iste vratili u prvobitni položaj. Radi se o ulicama Ivana Franje Jukića, putu prema Šipadovim zgradama i naselju Karašnica.

Iskoristit ću priliku da i ja čestitam na organizaciji obilježavanja Dana općine. Izgledalo je sve vrhunski i želim pohvaliti određena Udruženja koja su u ovom proljetnom periodu zaista napravila dosta aktivnosti, a to je u prvom redu Udruženje "Budi mi drug" i Omladinsko udruženje Carpe Diem koji su zaista pokazali da opravdano postoje na području općine Ilijaš i da služe svojoj svrsi.

AKIF BEŠLIJA – vijećnik SBB-a

Na prošloj sjednici Općinskog vijeća pokrenuo sam dvije inicijative. Druga inicijativa je bila prema općinskom načelniku da se iznađe rješenje za trajno rješavanje prostorija za Udruženje "Budi mi drug" iz Ilijaša. Tražio sam da se načelnik izjasni kako bi se ova inicijativa danas pretvorila u Zaključak. Načelnik je ovdje i ne znam da li je bilo šta po pitanju ove inicijative razmatrao? Zamolio bih da mi se odgovori i ako nije, da na ovoj sjednici ova inicijativa pređe u Zaključak.

HALID DIZDAREVIĆ – vijećnik SDA

Želim podsjetiti, kada su u pitanju zaključci, odnosno inicijative koje bi trebale preći u zaključak, molim vas da vodimo računa svi da li je to moguće i da li Budžet uopšte može da ostvari tu vrstu inicijativa.

ALMA OMEROVIĆ – predsjedavajuća

Upravo u vezi sa inicijativom pokrenutom od strane vijećnika Rasima Šehića i Besima Gljive, a shodno odredbama člana 3. Poslovnika o izmjenama i dopunama Poslovnika Općinskog vijeća Ilijaš mogu pročitati član ukoliko ima potrebe. Član 3. glasi: "Ukoliko podnesena inicijativa ne zahtjeva dodatna finansijska sredstva i provođenje određenih procedura, a ukoliko zahtjeva, o istoj treba da se očituje općinski načelnik koji će sačiniti informaciju i pismeno dostaviti, u pravilu, na prvoj narednoj sjednici Općinskog vijeća". Također, kolega Handžić je tražio da se inicijativa pretvori u zaključak i ako se slažete dala bih pauzu od pet minuta da načelnik razmisli da li se ove inicijative mogu pretvoriti u Zaključak.

AKIF FAZLIĆ – općinski načelnik

Mislim da je to Poslovnik definisao. Na prvoj narednoj sjednici dobit ćete izjašnjenja.

MUHAMED HANDŽIĆ – vijećnik BPS-Sefer Halilović

Moja inicijativa je od prije dva mjeseca i ona se ne odnosi na Budžetsku stavku iz općine Ilijaš. Dakle, ovaj Zaključak bi išao prema Ministarstvu komunalne privrede Kantona Sarajevo kojim bi mi tražili da se ovo hitno riješi i kojim bi na neki način izvršili pritisak na to Ministarstvo da nam se upostavi Centar za pružanje komunalnih usluga. Ne tražimo finansijska sredstva iz Budžeta općine Ilijaš.



AKIF FAZLIĆ – općinski načelnik

Nisam mislio na inicijativu koju je pokrenuo vijećnik Muhamed Handžić, jer ne zadire u Budžet općine Ilijaš. Mislim da je ta inicijativa dobra i ako cijenite da je treba pretvoriti u Zaključak, neka je Općinsko vijeće pretvori u Zaključak. Trebamo se zaista boriti da dođemo u poziciju da se taj komunalni Centar otvori u općini Ilijaš.

Govorio sam kada je u pitanju Poslovnik, a bile su dvije inicijative, odnosno prijedlog da se te dvije inicijative pretvore u Zaključak. Dakle, inicijativa Besima Gljiva i Rasima Šehića i druga inicijativa vijećnika Akifa Bešlije. One zadiru u realizaciju Budžeta i na te inicijative općinski organ, odnosno općinski načelnik će na prvoj narednoj sjednici, kako je definisano Poslovníkom, dati svoj stav po tim inicijativama.

AKIF BEŠLIJA – vijećnik SBB-a

Ja razumijem načelnika, ali ja sam ispoštovao sve te procedure i na prethodnoj sjednici sam pokrenuo ovu inicijativu i ostavio vremenski period da načelnik sagleda ovu moju inicijativu. Međutim, ako nije sagledao, evo za iduću sjednicu Vijeća očekujem stav po ovoj inicijativi. Znači, samo da kažem da ja nisam prekršio nikakve zakonske odredbe.

RASIM ŠEHIĆ – vijećnik SDA

Da su se pročitali ovi Zaključci, možda ne bi ni imali ovih diskusija iz razloga što konkretno ova naša inicijativa i pitanje koji su pretočeni u Zaključak ide tako da se Zaključak koji se usvoji prvo uputi Zavodu za hitnu medicinsku pomoć. Ukoliko Zavodu za hitnu medicinsku pomoć ne riješi ovo pitanje, mi ćemo imati sasvim dovoljno vremena. Trebat će nam sigurno mjesec-dva i niko i ne očekuje da to Zavod riješi u roku mjesec-dva. Znamo kako to ide. Službe će imati sasvim dovoljno vremena, a ja sam definitivno za to da se ovo pretvori u Zaključak i da se Vijeće izjasni.

ALMA OMEROVIĆ – predsjedavajuća

Inicijativu Besima Gljiva i Rasima Šehića pretvaramo u Zaključak koji glasi:

Traži se od Ministarstva zdravstva Kantona Sarajevo, JU Dom zdravlja Kantona Sarajevo i Zavoda zdravstvenog osiguranja Kantona Sarajevo da hitno obezbjede vozilo hitne pomoći za potrebe ambulate u Srednjem, obzirom da je isto bilo ranije pri ambulanti i pokrivalo širi rejon Srednjeg. Ukoliko naprijed navedene institucije ne riješi isto, da općina, u skladu sa mogućnostima, izvrši nabavku vozila.

Inicijativu Muhameda Handžića pretvaramo u Zaključak koji glasi:

Traži se od Ministarstva komunalne privrede i infrastrukture Kantona Sarajevo da u što skorije vrijeme, otvori Centar za pružanje komunalnih usluga građanima općine Ilijaš, koji bi bio od velikog značaja, obzirom da bi omogućavao plaćanje komunalnih usluga javnih preduzeća: KJKP "Vodovod i kanalizacija" d.o.o. Sarajevo, KJKP "Toplane" d.o.o. Sarajevo, KJKP "Rad" d.o.o. Sarajevo i KJKP "Sarajevogas" d.o.o. Sarajevo na jednom mjestu.

ALMIR ŠPIODIĆ – vijećnik BPS-Sefer Halilović

Mislim da u prvom Zaključku ne bi trebalo naglašavati da ukoliko JU Dom zdravlja Kantona Sarajevo ne obezbjeđe vozilo hitne medicinske pomoći, da će se uključiti općina. Znači, samo da se izbjegne taj dio rečenice, jer će se oni vjerovatno osloniti na to i reći da ne mogu obezbjeđiti vozilo i ponovo će teret pasti na općinu Ilijaš.

ALMA OMEROVIĆ – predsjedavajuća

Dala je na glasanje prvi zaključak.

Općinsko vijeće većinom glasova (vijećnik Anel Bumbulović se izuzeo od glasanja) donijelo

#### ZAKLJUČAK

Traži se od Ministarstva zdravstva Kantona Sarajevo, JU Dom zdravlja Kantona Sarajevo i Zavoda zdravstvenog osiguranja Kantona Sarajevo da hitno obezbjeđe vozilo hitne pomoći za potrebe ambulanata u Srednjem, obzirom da je isto bilo ranije pri ambulanti i pokrivalo širi rejon Srednjeg.

ALMA OMEROVIĆ – predsjedavajuća

Dala je na glasanje drugi Zaključak.

Općinsko vijeće jednoglasno donijelo

#### ZAKLJUČAK

Traži se od Ministarstva komunalne privrede i infrastrukture Kantona Sarajevo da u što skorije vrijeme, otvori Centar za pružanje komunalnih usluga građanima općine Ilijaš, koji bi bio od velikog značaja, obzirom da bi omogućavao plaćanje komunalnih usluga javnih preduzeća: KJKP "Vodovod i kanalizacija" d.o.o. Sarajevo, KJKP "Toplane" d.o.o. Sarajevo, KJKP "Rad" d.o.o. Sarajevo i KJKP "Sarajevogas" d.o.o. Sarajevo na jednom mjestu.

#### AD-2

Izveštaj o realizaciji zaključaka sa 28. sjednice

ALMA OMEROVIĆ – predsjedavajuća

Konstatovala je da na 28.sjednici Općinskog vijeća Ilijaš nije bilo zaključaka, te je Općinsko vijeće jednoglasno usvojilo

Izveštaj o realizaciji zaključaka sa 28. sjednice

#### AD-3

Prijedlog Zaključka kojim se usvaja Izveštaj o radu i finansijskom poslovanju za 2018. godinu Javne ustanove "Kulturno-sportski centar i Radio Ilijaš"

BENIS FAZLIĆ – direktor JU "KSC i Radio Ilijaš"

Želim istaći da je JU proslavila jedan jubilej, a to je 40 godina Radio Ilijaša.

13 uposlenika JU "KSC i Radio Ilijaš" u izvještajnoj godini su svakodnevno radili 12 sati radijskog programa. Kroz radijski program nastojali smo da efikasno i na vrijeme izvjestimo o radu Općinskog vijeća koje je osnivač ove Javne ustanove, načelnika, općinskih službi, mjesnih zajednica sa područja općine Ilijaš, kulturnih, sportskih, javnih i humanitarnih događaja na našoj općini, da budemo domaćini sportskim, kulturnim i humanitarnim događajima u našim prostorima. Pored Radio Ilijaša imamo i sportsku dvoranu u kojoj se održavaju sportski događaji, lokalna takmičenja, razni turniri, prvenstvene utakmice kako domaćeg tako i međunarodnog karaktera. U kino sali se događaju događaji kojima nastojimo da približimo sva ova zbivanja našim građanima, našoj djeci i našoj omladini. Kroz rad biblioteke, s želim posebno istaći da smo ove godine u zadnjih šest-sedam godina imali najveće povećanje knjižnog fonda. U sklopu svih ovih aktivnosti, Ustanova je u 2018. godini imala 485.000,00 KM prometa što je 8% više nego u 2017. godini. U strukturi prihoda budžetska stavka je veća za 17.992,00 KM, odnosno 5%, a vlastiti prihodi za 19.374,00 KM što čini 16% povećanja ukupnih prihoda, a što je za 37.000,00 KM više nego u 2017. godini. Pored redovnih aktivnosti koje su se dešavale u sklopu Ustanove i u ove dvije zgrade koje imaju cca 3000 m<sup>2</sup> m smo bili i gradilište. U izvještajnoj godini dobili smo prostor Biznis centra, dobili smo četiri sale za: BZK Preporod, HKD Napredak, Kulturno-umjetničko društvo i jednu salu za Muzičku školu koja se nalazi u sklopu Javne ustanove. Pored Biznis centra koji je u dosadašnje vrijeme pokazao opravdanost ulaganja, dobili smo i jedan reprezentativan trg koji nosi naziv Trg Alije Izetbegovića. Koristim priliku da se uvažnim vijećnicima koji su istakli obilježavanje Dana općine i Dana nezavisnosti BiH kao događaj koji je obilježio ovu godinu i isto tako da se kolegama pridružim da to isto napravimo, pa čak i bolje za Dan Armije.

Što se tiče druge tačke, Plan i program rada JU "KSC i Radio Ilijaš", dotaći ću se u ovoj, da više određeni prostori ove Javne ustanove postaju mali za neke naše aktivnosti. Ovdje prije svega hoću da istaknem nedostatak prostora za biblioteku koja se nalazi u okviru Ustanove. U tom pravcu bih zamolio kolege vijećnike, odnosno načelnika i nadležnu službu da probamo naći adekvatniji, odnosno proširiti taj prostor, a ukazala se potreba i za otvaranjem čitaonice. Ovo su možda dotiče više druge tačke dnevnog reda kada su u pitanju planske i programske aktivnosti, ali može se o njima pojedinačno glasati, ali evo da ih spojim i Trg o kojem sam govorio, govori o organizaciji Manifestacije "Ilijaški dani" koja bi trebala možda da dobije neke druge konotacije, neke druge sadržaje i u tom pravcu zamolio bih i pojedinačno članove Općinskog vijeća da za sve ideje koje imaju za tu Manifestaciju stojimo na raspolaganju.

U izvještajnoj godini imali smo četiri pripravnika Zavoda za zapošljavanje, što Kantonalnog što Federalnog, koji su obavili praksu u Javnoj ustanovi i dva volontera koje je općina angažovala. Iskreno se nadam da su uspjeli od kolega nešto i da nauče.

MUHAMED HANDŽIĆ – vijećnik BPS-Sefer Halilović

Pokušat ću da budem malo opširniji obzirom da sam dobio, da tako kažem, siromašan ovaj Izvještaj, pa i nekoliko stranica je manje nego prošli Izvještaj. Ovaj Izvještaj po elementima, po prihodima i rashodima ne govori ništa meni. Možda vi bolje razumijete, a vi koji ste tamo zaposleni najbolje razumijete. Ja ne razumijem. Dakle, prvo pitanje za onaj tamo displej na zgradi KSC-a – u čijem je vlasništvu i na koji način se vrši njegova upotreba, odnosno korištenje. Drugo, vidimo da je u protekloj godini transfer iz Budžeta općine Ilijaš bio 270.000,00 KM i nešto malo više, vidimo da su ukupni prihodi i rashodi negdje oko pola miliona, vidimo da broj zaposlenih nije naveden, ali mi znamo koliki je broj zaposlenih i znamo ko su zaposleni. Prihod od sportske dvorane planiran 30.000,00 KM, a realizovan 17.252,00 KM. Zašto je to toliko realizovano u odnosu na plan? To je drugo

pitanje. Dalje, prihodi od zakupnina planirano 90.000,00 KM, a realizovano 92.842,00 KM. Kakvih zakupnina, navedite o čemu se radi? Znamo da imamo antenski stub, par poslovnih prostora. Navedite nam to i to ste trebali navesti u Izvještaju, jednu po jednu stavku da vide vijećnici o čemu se radi. Ovako ne vidimo, a neki i ne znaju. Dalje, ostali prihodi 2000,00 KM. Kakvi su to ostali prihodi i to mi mi ne znamo? Kad ste ovako tabelarno napravili fino, trebali ste u nastavku obrazložiti svaku stavku pojedinačno da mi vidimo o čemu se radi. Tada bi to bio Izvještaj na nivou prethodnih Izvještaja od prije 2-3 godine. Naknade za prevoz na posao – 4.500,00 KM. Koliko ima radnika koji stanuju van gradske zone općine Ilijaš koji koriste taj prevoz? Da im kupimo godišnje karte za GRAS ili CENTROTRANS to ne bi bilo toliko.

To su nedostaci koje ja tražim i želim da ih imamo, a ako usvojite ovaj Izvještaj onda ste napravili nešto što nije u skladu sa Zakonom i nešto u što nemate uvid kolege vijećnici. Naknade po osnovu regresa, bolesti i smrti 8.000,00 KM. Ne znam da li je neko imao smrtni slučaj i u to neću da ulazim, jer vjerovatno postoje stavke za to koliko se daje, ali regresi, da je to neophodno kada mnoge ustanove ili javna preduzeća ne primaju, a vi koji se finansirate iz Budžeta općine Ilijaš planirali ste stavku regresa, ja bih se dobro zapitao. Sljedeće, nabavka knjiga u biblioteku 5.000,00 KM. Direktor je maloprije rako da su obogatili taj knjižni fond i da je biblioteka sada skoro puno i neka je, ali kakve li su to knjige koje smo kupili. Jesu li to knjige od onih za koje smo održavali književno veče, pa eto da ih malo nagradimo i kupimo im koju knjigu ili jesu li to oni podobni generali što im se držala promocija knjiga?

Ostale ugovorne usluge 5.000,00 KM. Navedite nam o kakvim se usluguma radi. Općinsko vijeće je zakonodavni organ kojem se trebaju podnijeti računi do kraja, a ja to ovdje ne vidim.

Troškovi goriva i prevoza 3.000,00 KM. Ja mislim da vi gospodine direktore nemate ni službeno auto, ne znam da li su nabavili službeno auto za Ustavu za ljude koji idu po terenu? Gorivo u privatna vozila se po zakonu ne toči. S tim u vezi, ovih 3.000,00 KM za gorivo treba opravdati. Znači u koje vozilo se sipalo gorivo. Na kraju krajeva, da ste taksista ne biste za godinu dana potrošili 3.000,00 KM za gorivo.

Telefonske usluge 5.000,00 KM. Pa ljudi moji, ne živimo mi negdje na kraj svijeta u nekoj pustinji. Znamo da postoji paketi koje nude svi, od Telemacha, BH Telecoma itd. Jedan paket od 1000,00 KM može podmiriti kompletan centar za godinu dana. Usluge interneta 1.000,00 KM. Znači zajedno sa telefonom 6.000,00 KM.

Usluge reprezentacije 3.000,00 KM. Mogu shvatiti da treba popiti sok i kafu, ali da treba ići na ručak u restoran svaki dan, to ne mogu nikako shvatiti.

Troškovi unajmljivanja imovine i opreme 10.000,00 KM. Šta ste vi iznajmljivali i od koga? Dajte, obrazložite nam ovo fino. Nismo mi ovce. Ovdje dolazite pred ozbiljne ljude da podnesete Izvještaj. Vi ste Izvještaj poslali na deset stranica. E neće takav Izvještaj nikada ovdje proći. Vi kolege vijećnici ovo podržite slobodno i vi ćete snositi odgovornost za to.

Troškovi reklamiranja i oglašavanja 2.000,00 KM. Vi ste informativna kuća, pa kakvi vam još troškovi oglašavanja trebaju kad vas sluša toliko naroda.

Izdaci za održavanje opreme. Kakve opreme? Je li se pokvario telefon na koji trošite 5.000,00 KM, pa ga morate popraviti? Obrazložite nam o čemu se radi. Ovo ovako ne ide. Iznajmljivanje prostora u 2018. godini 6.230,00 KM. To je za prostore koliko ste iznajmili. Da ne bih išao dalje, mislim da sam Vam postavio, za početak, dovoljno pitanja, a kada dobijem odgovore, onda će vjerovatno biti još pitanja na te odgovore ili ćemo davati konstatacije.

Čitajući Izvještaj koji nam je ponudio JU "KSC i Radio Ilijaš", pogotovo u ovom svom uvodu gdje se kaže da je ona ključni bosanski, a prije svega Ilijaški medijator umjetnosti i kulture i mislim da je ovo malo nespretno napisano uvaženi direktore. Da je Ilijaški, to se slažem, ali da je ključni Bosanski, složiti ćete se sa mnom, da se baš i nismo toliko razvili kada je ova Ustanova u pitanju. Analizirajući finansijski izvještaj koji ste nam ponudili, gledajući podatke koje ovdje imamo i kada uzmemo prihode koje ste dobili iz Budžeta, a iznose 347.000,00 KM, poredeći sa rashodima, a tiče se radne snage uposlenika i troškova koji prizilaze iz njihovog radnog angažmana utvrditi ćete da su skoro pa cijeli prihod koji dobijemo iz Budžeta ide upravo na utrošak da bi se isplatile plate i sve ono ostalo što nema karakter plate, a ovdje ste to naveli. Znači, 320 i nešto hiljada KM vi trošite godišnje čisto da bi se tamo kao nešto radilo. Po meni je malo da se vlastitim sredstvima učestvuje sa 138.000,00 KM i to je neka trećina od ukupnih prihoda uzimajući u obzir da imate i prihod od zakupnina koji iznosi 92.000,00 KM. Ovdje ste nam prikazali zakupninu od Antenskog stuba na Karašnici gdje smo se mi vijećnici odrekli da tu vrstu prihoda uprihoduje općina i dali je vama da vam na neki način pomognemo. Tako da se svakako vi u budućnosti morate malo više angažovati kada su u pitanju vlastiti prihodi, a imate i šta ponuditi. Jasno je da je Radio imao jubilej, 40 godina rada, 1978. godine je osnovan i svrha osnivanja Radio Ilijaša i njegovog postojanja zapravo jeste da se pružaju informacije građanima općine Ilijaš. Koliko vi to dobro radite govori sama činjenica da, nažalost, imate tamo ljude koji su u profesionalnom angažmanu i bave se tom vrstom posla. Informacije koje vi pružate nemaju efekat koji postižu efekat određeni portali koji se rade na volonterskoj bazi. Dakle, vi imate opremu, imate ljude stalno angažovane u radnom odnosu, to im je primarni zadatak da se time bave i imamo situaciju da imamo neke privatne portale u Ilijašu koji koristeći društvene mreže su vas u toj priči pretekli. Dakle, to je nešto što se ne smije dešavati.

Što se tiče Izvještaja upravljačkih struktura, moram reći da je ovo vrlo loše napisano. Ni jednu stranicu niste upotpunosti napisali, a tiče se njihovog rada, a mene kao osnivača zanima, mi mu povjerili temo neke poslove i treba da me informiše šta su to oni tamo radili u protekloj godini dana. Ovdje mislim, prije svega, na Upravni odbor. Tako da ću vas zamoliti da ubuduće kada budete podnosili ovu vrstu Izvještaja da navedete tamo šta je rađeno, koliko je bilo sjednica, koje su tačke dnevnog reda, o čemu su to oni raspravljali, pa da mi vidimo zapravo šta to oni tamo rade. Mi ništa ne znamo, a tiče se njihovog rada, nažalost, jer je pogrešna metodologija pisanja ovog Izvještaja.

Što se tiče zakupnine, vidimo da smo je povećali za 2.000,00 KM u odnosu na plan koji ste imali i ja vam na tome čestitam. A kada rashode malo detaljno sagledamo vidjete ćete da je ovih 2.000,00 KM viška koje ste uprihodovali, jer je ovo otišlo za plaćanje izdataka, a tiče se vode i kanalizacije 1.300,00 KM u odnosu na prethodnu godinu. Vjerovatno se radi o nekim dugovanjima, pa ste u toj godini gledali da to suzite što više i svakako da je otišlo na troškove, odnosno usluge reprezentacije koji su, moram priznati, bezobrazno visoki. Skoro 1.000,00 KM povećana je reprezentacija. To je nedopustivo. I kada to podijelite sa 12 mjeseci, ispade da ste vi godišnje trošili nekih 320.00 KM na reprezentativne usluge. U rashodima vam nedostaju sve obaveze koje imate kao Kulturno-sportski centar, a vi znate o čemu ja govorim. Nekada sam prije par godina o istim govorio, a koliko vidim i u Planu rada za iduću godinu, ova sljedeća tačka, opet ste to izostavili. Dakle, sam Plan vam generiše neke nove obaveze i neka nova dugovanja i u budućnosti to morate staviti da se vidi. Ja sam imao dobru volju, razgovarao i sa vama i sa načelnikom, da na neki način probamo to riješiti, međutim, nažalost, nikada do toga nije došlo. U najboljoj namjeri, jer sam mislio stvarno da vam se treba pomoći, jer vi kao ustanova, da budemo realni i

nemate baš nekog prostora da budete neka visokoprofitabilna kompanija. To je činjenica. Znate na kakvom je nivou kultura i umjetnost, ne samo u Ilijašu, nego i na prostoru cijele Bosne i Hercegovine.

Prihodi od dvorane su takvi kakvi jesu. Možda ste vi malo ambiciozno i planirali ovih 30.000,00 KM. Međutim, ovdje moramo biti realni pa reći, i mi, želeći provoditi neke naše politike da tiču se oblasti sporta, vama namećemo nove obaveze u smislu da tu dvoranu besplatno koriste naša sportska udruženja. To je činjenica. Ali, isto tako bi trebali mi, u konačnici služba da kaže, koliko je to sredstava koje mi na nivou godine ulažemo i na ovaj način u sport. Po meni, apsolutno je pogrešno napravljen sistem kako se finansiraju sportska udruženja. Svi smi mi u našim izbornim programima imali, prvi SDP-e, a onda i načelnik Akif Fazlić je kazao da ćemo mi ubuduće sport finansirati kroz Sportski savez. Nikad se to nije desilo, niti će se desiti. Ja jednostavno ne vidim naznake da neko želi nešto da uradi na tom polju. Ne može Savez, može sportsko društvo, a onda da mi donesemo ovdje odluku šta je to od javnog interesa iz oblasti sporta i na koji način ćemo to finansirati, da omogućimo djeci da mogu besplatno trenirati kroz Sportski savez, bez članarina, bez išta. Sva ova silna udruženja koja su nastala iz razloga što se tamo nije neko slagao sa načinom vođenja, odnosno sa Upravom tih sportskih udruženja, oni nek se finansiraju na istoj osnovi. Ako ste toliki eksperti, budi te.

Što se tiče dalje Izvještaja, ono što me posebno zanima jesu izdaci za tekuće održavanje zgrada 17.716,00 KM. Volio bih da mi se obrazloži o čemu se konkretno radi i ono što sam primjetio da kapitalni transfer iz Budžeta općine Ilijaš nije prikazan gdje je utrošen. Ne znam šta se kapitalno radili, ali vjerovatno ste vi provodili te poslove.

To je sve za sada, ali ako bude bilo potrebno, javit ću se još jednom.

ALMIR ŠPIODIĆ – vijećnik BPS-Sefer Halilović

Pročitao sam ovaj Izvještaj dva puta i razmišljao sam da se uopšte ne javljam da diskutujem po ovoj tački s obzirom da ne bi neko nešto pomislio da govorim lično vezano za direktora, za Upravu, za neke kolege, ali moram da kažem, Izvještaj ovakav kaka je, napisan na petnaest stranica gdje se rečenice, pa i čitavi pasusi ponavljaju više puta, ne mogu da prešutim, ali ima i ono što se vama može i čestitati. Ne mogu da prešutim ovo što nas na neki način ponižavate i da nam jednu, te istu rečenicu ponovite, a ona glasi: "Radio Ilijaš je u 2018. godini radio u principu 12 sati dnevno". Znači, od 07:00-19:00h. Čestitam na ovome, za to ste i plaćeni i radili ste. Međutim, dalje kaže, 24 sata dnevno putem web stranice. Nisam znao da se web stranica isključuje nakon sedam sati, odnosno naveče, pa se ponovo uključuje ujutro. Valjda se pristup web stranici imamo 24 sata, bilo kojoj web stranici, ne samo vašoj. Ili možda ima nešto što vi radite putem interneta, putem web stranice u 11, 12, 13, 14 h uveče. Tu mi je bilo nejasnoće i ova vaša rečenica me ponukala da se javim da diskutujem. Ova rečenica i ovaj čitav pasus se nalazi u uvodu i još na dvije ili tri stranice. Vjerovato da bi se što više stranica dobilo ovog materijala. Kolega Handžić i Šerak su komentarisali vezano za Budžet, a ja sam prošle godine govorio o tome i ove godine zaista neću da se stavljam u ulogu nekog stručnjaka za Budžet, ali moram da kažem ono nešto što mi "zapadne za oko" svake godine, a to je Izvještaj vezano za organizaciju Manifestacije "Ilijaški dani". Meni je interesantno da od 2016. godine, 2017., 2018. godine, pa planirano i 2019. godine za vrijeme navedene manifestacije koja traje sedam dana konstantno se parkira 500 vozila, jer vidimo u Izvještaju da je prihod od parkinga 500,00 KM. Promijenite malo, pa neka bude 600,00 KM ili 400,00 KM, ali promijenite to, ne mora uvijek biti 500,00 KM. Ima dosta stvari koje se spominju i neću da uzimam vrijeme kolegama i nadam se da će se još neko javiti za riječ i da će biti još diskusija. Što se tiče ovog Izvještaja, ja stvarno ne mogu glasati. Cijenim da nam treba

Radio Ilijaš i da nam treba kvalitetan i cijenim da se ljudi trude da naprave kvalitetan sadržaj i ima tu nekih pomaka. Ali, konstantno se povlači priča stare opreme koja se nadljudskim naporima održava vrhunskim majstorima i ja im čestitam na tome. Kako ste naveli u Izvještaj da nema tih vrhunskih stručnjaka, obzirom da je oprema zastarjela, mi ne bi imali emitovanje današnjeg radija. Znači, ima tu i dobrih stvari. Kada je u pitanju sam rad Radio Ilijaša, ima tu i nekih dobrih emisija, noviteta, omladine, ima svega, ali mislim da ovaj Izvještaj samo kada bi napisali onoliko koliko ste radili bio puno bolji i prihvatljiviji.

HALID DIZDAREVIĆ – vijećnik SDA

Nisam se mislio javljati, ali po pitanju nekoliko stvari moram dati komentar. Slušajući kolege vijećnike, zaista ima osnova ovo sve što su pričali, ali ima i dobrih stvari. Npr. novinari rade dobar posao, uzimajući u obzir kako je to bilo prethodnih godina. Kada su u pitanju prihodi mi imamo ovdje repetitor, pa drugi prihodi, evo ostane 60.000,00 KM i u tom smislu jedna uputa direktoru da možda izdvoji nekoliko hiljada KM za popravak puta prema prilazu repetitoru koji se konstantno uništava kako dolaze serviseri da rade taj dio posla. Da li će to biti iz Budžeta općine Ilijaš ili neće, ne znam. Takođe i kompletna dionica puta se uništava, jer gore imamo i Sarajevošume i sve ostalo. Kada je u pitanju izdavanje sportske dvorane takođe mislim da malo treba poraditi na marketingu i na uslovima kako bi se prihodi znatno povećali, jer imamo jednu sportsku dvoranu u Ilijašu i da ne dozvolimo da ljudi idu u Hotonj, Sarajevo ili Visoko da igraju nogomet, a rekreativaca sigurno ima. Naravno, kako je rekao kolega Šerak, sportska dvorana se velikim dijelom izdaje našim sportskim udruženjima koji su korisnici te sportske dvorane i naravno imamo rezultate. Mi moramo da shvatimo da smo u Ilijašu imali premijerligaša koji je koristio dvoranu, a to je Odbojkaški klub Ilijaš i puno drugih korisnika. S tim u vezi, napomenuo bih da bi trebalo otprilike da podjednako dajemo termine sportskim udruženjima, jer neka sportska udruženja koja se bave istim djelatnostima, a neki imaju znatno veći broj termina, a neki manje. Dakle, o toj raspodjeli da se povede računa i da budu jednako svi zastupljeni.

MUHAMED HANDŽIĆ – vijećnik BPS-Sefer Halilović (replika)

Kolega Dizdareviću, ja nisam ni očekivao da ćete Vi reći ono što sam ja rekao ni blizu. Vi govorite onako kako rade. Što hvalite novinare? Pa i ja bih ih pohvalio da rade u interesu moje Stranke, moje političke partije, ono što rade u interesu vas. Jer, Radio i kompletan KSC, nije narodni javni emiter. To je režimski Radio i emiter i što sam ja rekao u prvoj tački dnevnog reda – pitanja i inicijative, što se reduciraju čak nama Izvještaji sa Općinskog vijeća. Znači i Izvještaji sa Vijeća nam se reduciraju, ne mogu nas slušati ni ovdje da pričamo, a kamoli da objave slučajno tamo nešto što smo mi, ne daj Bože, lijepo uradili. E to neće sigurno, a puni su ovih vaših "kadrovnjaka", a koji je to egoizam, čak i novinar je gost svog studija i objašnjava svoj životni put, kojih mi nažalost, imamo hiljadu takvih. Kažete novinari rade profesionalno. Jesu, jesu, dok dođu na red, vidjet ćemo koliko su profesionalni.

HALID DIZDAREVIĆ – vijećnik SDA (krivi navod)

Ja nisam prvi put replicirao kolegi Handžiću, rekao sam samo da se u odnosu na prethodni period bolje radi na terenu. To je jedna stvar. Krivi navod se odnosio na rečenicu kada je kolega Handžić rekao da rade u moju korist. Moram reći da ne rade u moju korist zaista, rade onako kako oni imaju svoje nadređene i rade onako kako misle da treba da rade na tom radnom mjestu.

## BESIM GLJIVA – samostalni vijećnik

Možda su kolege iscrpile diskusiju i slušajući izlaganje direktora i izlaganje mojih kolega vijećnika, neću ulaziti u suštinu Izvještaja. Možda je Izvještaj trebao biti malo opširniji i da budem pošten nisam ga baš temeljito ni pročitao, jer znam da će se o njemu komentarisati, a obzirom da sam dugo vijećnik mislim da mi je lakše saslušati nego čitati, jer će mnogi puno reći o ovom Izvještaju. Međutim, kada se tiče Radio Ilijaša, nekoliko sam puta diskutovao na tu temu. Radio Ilijaš je jedan jedini medij koji ima općine Ilijaš iako ja smatram da općina Ilijaš zaslužuje jači i veći medij. Mislim da je možda i sazrela situacija da Ilijaš ima i lokalnu televiziju Ilijaš. To više nije neki veliki bauk, veliki posao, niti to iziskuje neka ogromna sredstva da bi se tako nešto ostvarilo na području općine Ilijaš. Općina Ilijaš je postala jedna prepoznatljiva općina na kojoj se organizuju mnoga dešavanja u posljednjim godinama tako da bi bilo prostora i za rad neke televizije. Što se tiče Radio Ilijaša, mi vijećnici, bar određeni broj, a čast izuzetcima, obično sebe shvatimo kao članove nadzornog odbora ili slično i najčešće mi samo kritikujemo rad bilo koga. Ja ne želim ovdje da imenujem bilo koga. Mi kritikujemo rad bilo koga. Međutim, nas su ljudi izabrali da damo neku dobru inicijativu, da predložimo nešto dobro i da se to realizuje. Radio Ilijaš postoji četrdeset godina i ja pamtim vremena kada je on dva puta proglašavan najboljom i najjačom radio stanicom na području Socijalističke republike BiH do rata. Njegov kontinuitet poslije rata je uvijek bio povuci-potegni i trebalo je od "ništa" napraviti "nešto". Činjenica je da možda on svom zadatku ne odgovara adekvatno tj. onako kako bi svi mi željeli. Međutim, ono što hoću da kažem jeste da bi trebali raznim idejama, a evo moja jedna jeste TV Ilijaš. Znači, da pokušamo razmišljati pozitivno i da damo ideju kako prevazići sve ove stvari.

Kada se tiče samog Izvješta, ne sumnjam u bilo šta unutar tog Izvještaja, a da li treba biti opširniji, vjerovatno treba i možda treba tražiti od menadžmenta da Izvještaj prošire u skladu sa pitanjima kolega vijećnika. Još jednom da ponovim, molim vas da, inače kada se tiče Radio Ilijaša jedinog medija koji naš grad ima, koliko ja znam, u drugim općinama se izdvajaju i značajnija sredstva, te u tom smislu od kolega vijećnika tražim da u nekom narednom periodu damo zdravije ideje kako taj Radio Ilijaš, pa ako treba i rekonstruirati, da pomognemo da bude bolji.

## ALMIR ŠPIODIĆ – vijećnik BPS-Sefer Halilović (replika)

Hvala kolegi Besimu Gljivi koji mi je ostavio mogućnost da mogu replicirati i da kažem ono što sam možda zaboravio da kažem u prvom izlaganju. Replika se odnosi na to da mi dajemo ideje kako bi se unaprijedio rad JU KSC i Radio Ilijaš. Ne znam da li je kolega Besim bio na sjednici 2018. godine kada smo usvajali Plan rada JU KSC i Radio Ilijaš za 2018. godinu. Na moj prijedlog, pokušavajući ovako kreativno da dam prijedlog i da dam ideju kako bi se unaprijedio rad te institucije, a u svrhu stvaranja boljeg društvenog života na području općine Ilijaš, dao sam prijedlog da se u Plan rada uvrsti formiranje ledene plohe u zimskom periodu u užem jezgru grada Ilijaša što je pretočeno u Zaključak i taj Zaključak u sklopu Plana rada je usvojilo Općinsko vijeće. Međutim, ja čestitam direktoru na sposobnosti da tako sve nas, 25 vijećnika koji smo jednoglasno donijeli taj Zaključak ponizi i ne poduzme baš ništa po tom pitanju tj. da se to realizuje. Ustvari, moram se ispraviti, poduzeto je, jer sam postavljao pitanje dokle je došla realizacija tog Zaključka, a dobio sam odgovor da su oni poslali ponude određenim firmama koje postavljaju ledene plohe i da oni nemaju para za to. Treba općina ponovo obezbijediti dodatna sredstva. U suštini, oni nisu uložili nikakav napor. Nije problem da i to općina finansira. To je nešto što donosi i profit, ali donosi i dobar imidž jednoj općini. Ne znam ima li svrhe da ja ponovo



dajem neke ideje? Imam ih i sada, ali neću ih davati iz razloga da me neko ne bi ponižavao. Usvojiš, pa me kasnije ignorišeš.

ALAN ŠERAK – vijećnik SDP-a

Volio bih da smo se malo više dotakli Manifestacije "Ilijaški dani". Svi smo mi na neki način u svojim diskusijama se osvrnuli na rad KSC-a, a kada je u pitanju ova Manifestacija koja je sastavni dio Izvještaja, nismo baš puno rekli. Dakle, možemo konstatovati da nam je Manifestacija uspjela prošle godine, pogotovo ako gledamo finansijski aspekt same Manifestacije. Jesmo li sadržajno zadovoljni sa istom, da li treba nešto mjenjati, treba li nešto korigovati, modifikovati...? E to sada treba i mislim da je idealna prilika na ovoj tački dnevnog reda da malo šire prodiskutujemo o tome kakvu mi to manifestaciju želimo. Svake godine nam se dešava da neko ima niz primjedbi na samu Manifestaciju i isto tako nam se dešava da imamo nekih pohvala. Ja ovo govorim s aspekta člana Organizacionog odbora. Tamo sam po Zaključku Općinskog vijeća obavezan da budem. Pogotovo ako znamo da se Ilijaš dodatno izgradio u protekloj godini i znamo da smo suzili mogućnosti prodajnog prostora samom KSC-i imajući u vidu da sada imamo novi Trg koji smo na neki način prošli na uštrb parkinga koji je bio ispred sportske dvorane i na taj način smo smanjili prodajni kapacitet, odnosno prostor za iznajmljivanje koji su iznajmljivali u prethodnim godinama. Ja ću svakako biti prvi protiv toga da se bilo kakva organizacija prodaje održava i na Trgu, a ujedno i na našem šetalištu, jer smatram da su to stvari i ulica koje treba da zaštitimo da traju što duže. Međutim, treba da vidimo da li smo sadržajno zadovoljni sa samom Manifestacijom. Jesmo li zadovoljni sa ovim estradnim umjetnicima koji su nam gostovali? Imamo li nekih primjedbi? Želimo li neka zvučna imena? Ako želimo zvučna imena, onda znajte da 5.000,00 KM koje donira općina Ilijaš u tu svrhu, neće biti dostatno. U tom smislu, zamolio bih vas sve da se malo više uključimo u ovu vrstu priče i da konačno mi sutra imamo što lakši zadatak kada dođemo na Organizacioni odbor i kažemo evo vijećnici su tražili to i to, oni predstavljaju građane i hajdemo im zadovoljiti te stvari. Svakako bi se trebao i načelnik očitovati po tom pitanju, jer je neminovno da će se morati malo veća sredstva izdvojiti u tu svrhu.

BENIS FAZLIĆ – direktor JU KSC i Radio Ilijaš

Odgovorit ću vam na sva pitanja, ali neko ko je jedanaest godina sjedio u sličnoj sali Općinskog vijeća koja se u to vrijeme nalazila u podrumskim prostorijama ove prelijepe zgrade, dograđane i lijepe sale, imam osjećaj, ako je ovo sve problem što mi imamo u Ilijašu, onda smo dobri. Krećući se u okruženju, za ovo što radimo u Ilijašu, zavide nam od Olova do Fojnice. Ponosan sam ja i na ovaj sastav Općinskog vijeća, ali zamolio bih općinske vijećnike da ovu Ustanovu na čijem sam trenutno čelu, smatraju svojom – Kulturno sportski centar i Radio Ilijaš. Nemojte da ona bude poligon za neke stvari. Ima mjesta i načina da se i o tim stvarima razgovara, ali ovo ide u eter. Ne mogu, a da ne ostanem dužan uvaženom vijećniku Handžiću, Radio Ilijaš reemitira sjednice Općinskog vijeća Ilijaš, ne reducira ništa. Jedino uzimam mogućnost da mi neko nešto radi iza leđa, a ne bi smio. U tom pravcu, mi snimamo sjednice Općinskog vijeća i sutradan nakon sjednice, u 13:00 h se emituje sjednica preko Radio Ilijaša. Vjerujte da ja većinu sjednica Općinskog vijeća, ne baš do kraja, preslušam i zadovoljan sam ovim što vi ovdje radite, što radi načelnik i što rade službe.

Ovo što je vijećnik Šerak govorio, činjenica je da očekujući i pričajući o Planu ove javne ustanove za ovu godinu, da hoće bar biti kao ova 2018. godina. Usput ću odgovoriti na neka pitanja. Vi znate da izgradnjom fiskulturne sale u OŠ "Hašim Spahić", ne održavaju

više časove sporta u sportskoj dvorani. Također, nedavno je potpisan ugovor za izgradnju fiskulturne sale u SŠC "Nedžad Ibrišimović". Tragom ovoga, svake godine imamo 2-3 sportska kluba koji dolaze i evo dajte i ovo, način korištenja kapaciteta javne ustanove. Zna da samo tamo najljepši prostor iskoristili. Naime, četiri kulturna udruženja koriste te prostore. Tamo je 75 djece svaki dan koji idu u Osnovnu muzičku školu. Tamo se događaju, koliko god mi htjeli ili ne htjeli i neke fine stvari. Tamo se dešavaju i neke životne drame.

MUHAMED HANDŽIĆ – vijećnik BPS-Sefer Halilović (poslovnička intervencija)

Molim Vas, dobili ste pitanja i odgovarajte po pitanjima. Ovo nije Izvještaj načelnika općine da nam pričate ko nam zavidi od svih općina. Mi smo Izvještaj načelnika općine usvojili i on je takav kakav jeste i na koji način smo ga usvojili to ste čuli. To da Vi cijenite naš rad i jeste li zadovoljni ili niste, takođe niste Vi taj koji će cijeniti naš rad, nego mi Vaš rad ocjenjujemo. O tome pričamo. Usmjerite se na pitanja koja smo Vam postavili, od prvog do zadnjeg. Koliko ja vidim, Vi nama pričate "lijevo-desno" i ja ne razumijem ništa. Hoću da čujem odgovore.

BENIS FAZLIĆ – direktor JU KSC i Radio Ilijaš

Kolega Dizdarević postavio je pitanje prilaznog puta na Karašnici – pokušat ćemo to uraditi. Kolega Špiodić postavio je pitanje što svake godine 500,00 KM za parking u vrijeme Manifestacije "Ilijaški dani" – mi taj parking prostor za vrijeme ove Manifestacije izdajemo Udruženju RVI Ilijaš i taj zakup košta 500,00 KM. Ne mjenjamo ga iz godine u godinu. Ako mislite da se ponavljamo, a ponavljamo se. Međutim, možete doći i pogledati Ugovor koji je sklopljen sa Udruženjem RVI Ilijaš.

Kolega Šerak, pitanje Budžet - plata – činjenica je da najveći dio Budžetskih sredstava trošimo, a 138.000,00 KM vlastitih prihoda nije ni zanemariti.

Pitanje Portala i ovaj dio – ja ne bih komentarisao. Ovih 17.000,00 KM koje ste tražili, utrošeno je za rekonstrukciju grijanja. Prelaskom na sistem grijanja gradske Toplane, Sportska dvorana u avbustu ima faktura za grijanje 2.500,00 KM, jer se dio sredstava plaća i van grijne sezone.

Kolega Handžić, pitanje displej – firma Network sa kojom je potpisan Ugovor i ako treba dat ćemo ga na uvid.

Iznos od 280.000,00 KM smo prikazali u finansijskom Izvještaju.

Dodatnih zaposlenih u izvještajnoj godini nije bilo i to smo naveli, osim angažovanja uposlenika preko Zavoda za zapošljavanje, odnosno angažovanje uposlenika volontera preko službe općine Ilijaš.

Ovo smanjenje, odgovorio sam na što se odnosi, na korištenje časova sporta kada je u pitanju Sportska dvorana. Zna da smo izdavanjem prostora BBI banci koji je izdala općina, izgubili jednog zakupca i za zakupnina u 2018. godini je iz tih razloga manja. Prevoz na posao koristi šest uposlenika po Poslovniku o radu Ustanove. Regres smo podijelili, a o bolestima sada nije lijepo da ovdje govorim, ali postoje podaci. Ono iza čega stojim jeste da je finansijski Izvještaj urađen u skladu sa pozitivnim zakonskim propisima i analitički dio tog Izvještaja imate ovdje.

Knjige – najveći dio knjiga, preko 95%, se odnosi na beletristiku ili lektiru. Nismo uzimali knjige ovog sadržaja o kojima je ovdje bilo riječi.

Gorivo 3.000,00 KM – Ustanova ima službeno vozilo i tih 3.000,00 KM je utrošeno u ove svrhe i gorivo je nasuto u službeno vozilo.

Telefonske usluge 5.000,00 KM – na nivo su prošlogodišnjeg, možda je koja KM

više-manje.

Reprezentacija 3.000,00 KM – odgovorno tvrdim da sam u 2018. godini imao 300,00 i nešto KM reprezentacije, a ovih 3.000,00 KM se odnosi na koktel povodom 40 godina Radio Ilijaša (2.000,00 KM i nešto).

Imovina i oprema – mi dio opreme iznajmljujemo na Antenskom stubu Nišići BHRT1 i Antenskom stubu Perun (ovaj dio koji se odnosi na 10.000,00 KM).

Opravka opreme – u prošloj godini smo izmjenili predajnik na Antenskom stubu Karašnica, a ove godine smo planirali izmjeniti predajnik na Antenskom stubu Nišići.

Evo toliko, ne znam da li ima nešto da sam preskočio odgovoriti.

MUHAMED HANDŽIĆ – vijećnik BPS-Sefer Halilović

Ima kolega. Niste mi odgovorili za displej koji se nalazi na zgradi KSC-a u čijem je vlasništvu.

BENIS FAZLIĆ – direktor JU KSC i Radio Ilijaš

Vlasnik je firma Network iz Sarajeva.

MUHAMED HANDŽIĆ – vijećnik BPS-Sefer Halilović

Vi to njima iznajmljujete i niste nam naveli koliko para je to iznajmljivanje. Kada Vi izvještavate, nemojte me shvatiti kao revizora. Mi hoćemo da pomognemo da se na najbolji mogući način podnese Izvještaj o Javnoj ustanovi čiji smo mi osnivači. Dakle, kada govorimo o reprezentaciji, ja znam da Vas ne vidamo da skitate po kafanama i da ste domaćin čovjek. Ne podilazim Vam nimalo i znam da ne trošite sredstva na kojekakve ručkove i slične stvari. Vi ste rekli da ste ih potrošili za koktel i da sam znao da je za to, ja ne bih ni postavio ovo pitanje. Znači, ovdje se morala svaka stavka obrazložiti, jer to su anomalije ili nedostaci ovih Izvještaja. To što Vi meni zamjerite, hoću da Vas usmjerim da svaku stavku mi moramo obrazložiti da ne bi došli u situaciju da neko ima neku sumnju u bilo kakve postupke koje mi radimo, odnosno u cifre koje mi navodimo. Evo, gorivo za službeno vozilo. Ja sam jednom prvi kritikovao ovdje što nemate službeno vozilo. Rekao sam da se Vaši uposlenici voze sa traktorima ili stopom da naprave neku zabilješku ili nešto snime. Možda sam i ja time doprinio da se to vozilo nabavi za KSC. Neka se nabavilo, treba da imate službeno vozilo, treba da služi svrsi, a ne da služi ne znam već čemu. Morate me shvatiti da dobronamjerno postavljam pitanja ovdje, ali ovakav Izvještaj na petnaest stranica od jedne ovako ozbiljne Ustanove, zaista ne možemo na ovaj način prihvatiti. Morate, od tih ljudi koji rade kod Vas, a znam da su skoro svi visokoobrazovani, koji su naučili ove kliše, tražiti da naprave jedan okvirni plan tog Izvještaja, odnosno format koji će nam dostavljati ovdje i neće se stidjeti nikoga. Mi pomoćnici načelnika za finansije nismo nikada postavili pitanje, jer se sve dostavi po elementima i razrađeno do detalja. U ovom Izvještaju to ne vidimo. Znači, morate nas razumjeti, nas koji ovdje glasamo. Ja Vas stalno vidam i pijem kafu sa Vama i sad možete misliti da imam nešto protiv Vas, a kako ću imati kada skupa pijemo kafu. Znači, nemam ništa proti Vas i Vaših uposlenika zaista i to morate shvatiti. Morate i Vi biti malo tolerantni i znati šta mi ovdje možemo prihvatiti, a šta ne možemo. Ja se ovdje ne igram politike. Govorim u svoje ime. Ne igram se politike da ja zastupam neku ni stranku, ni platformu, nego sam jednostavno domaćin i odgovoran čovjek. Kada mi nešto doneseš hoću da to ima svoj sadržaj, početak i kraj.

ALMIR ŠPIODIĆ – vijećnik BPS-Sefer Halilović (replika)

Postavio sam pitanje za parking i nisam znao dok niste obrazložili, jer to u Izvještaju ne piše. Znači, upućujem sugestiju da nam obrazložite da i mi ne dangubimo i ne postavljamo dodatna pitanja.

BENIS FAZLIĆ – direktor JU KSC i Radio Ilijaš

Na str.15 Izvještaja, stavke koje su odstupale od dosadašnjih troškova, a odnose se na troškove reprezentacije, u zagradi stoji organizacija obilježavanja 40 godina Radio Ilijaša, kao i troškova grijana – izmirenje obaveza iz prethodnih godina.

MIRSAD OSMANOVIĆ – vijećnik SDP-a

Meni je drago što je ova diskusija iznjedrila nešto o čemu ja godinama govorim. Ja vjerujem i menadžmentu sugerišem da prihvati sve ove diskusije koje su sigurno dobronamjerne. Međutim, predložit ću nešto što sam predlagao i prošle i preprošle godine o stvaranju brenda Ilijaša. Jasno je da nam je "košulja tijesna", potrebe za nadogradnjom, odnosno dinamika razvoja sporta i kulture u općini Ilijaš nadilaze organizacioni kapacitet KSC-a. Ove diskusije mi smo usmjerili samo na KSC-e, jer se radi o njegovom Izvještaju. Međutim, kada se tiče sporta i kulture, on je mnogo širi i mi imamo ovdje i službu, odnosno općinsko vijeće, općinski organ, a potcrtavam služba KSC-e. Ovo što je Alan govorio, Muhamed govorio, moramo napraviti organizaciju. Toliko lijepih stvari se dešava ovdje kada se tiče sporta. Moj najdraži projekat je kada su počeli radovi za izgradnju dvorane. Imamo sportiste, imamo reprezentativce, a uvažavajući ove greške koje se rade i koje baš mislim zbog ovog kapaciteta i želje se prave. Imam ja dosta pitanja i za direktora, a o Radio Ilijašu neću govoriti. Potpuno se slažem sa Muhamedom. Kada se tiče ostalih poslova koje radi KSC-e smatram da kapacitet KSC-a je nadrastao, odnosno nije dovoljan za ono što mi radimo u Ilijašu kada je u pitanju naša omladina, sport, kultura i sve ovo što su prethodnici govorili. Zašto sam se javio? Prvo, nisam se htio javiti za diskusiju, nisam zadovoljan materijalima za Općinsko vijeće. Tako i ovaj materijal ima nedorečenosti, ali neke stvari direktor je potcrtao, mada sam više volio da je stavio jedan segment – mjesto uposlenika. Obzirom da sam ja sindikalac, možda bi dobro bilo da je, kada je u pitanju njihov angažman, stavio 4-5 rečenica. Ja predlažem da Vi komplet ove diskusije uvažite i polovinom godine održimo tematsku sjednicu, da uključimo Općinsko vijeće, općinski organ, KSC-e, jer Ilijašu treba, a Alan je predložio, sportsko društvo. Najvjerovatnije da ćemo dobiti bolju organizaciju, bolje će funkcionisati KSC-e i biće naši konzumenti zadovoljniji. Vjerujem, kada se tiče kontrole ulaska sredstava, odnosno adekvatnije će se koristiti, jer imat ćemo jedan kvalitetniji sistem. Meni je žao što načelnik nije prepisao moj program kada sam bio kandidat, jer sam baš obradio taj dio sporta i kulture. Taj dio sporta i kulture ne smijemo gledati kao prihodovnu stranu. Sport i kultura, komplet nadgradnja, su troškovi. Još jednom molimi i direktora i svoje kolege da, prvo direktor dobronamjerno shvati diskusije, a da se mi angažujemo, pogotovo ljudi koji se bave sportom i kulturom, a nadam se i komplet ova sala kako bi dobili ono što je potrebno Ilijašu – jedan brend.

ALAN ŠERAK – vijećnik SDP-a

Ja bih volio da se malo više bavimo Manifestacijom "Ilijaški dani" u sklopu samog Izvještaja, ali koliko vidim opet će, nažalost, sav taj teret pasti na članove Organizacionog odbora. Moramo imati na umu da smo na prošloj sjednici digli ruke za kreditno zaduženje općine i da ćemo izgraditi stadion. Isto tako moramo imati na umu da će tim stadionom

najvjerovatnije, ako budemo razumni, upravljati KSC-e. Znači, još dodatnih obaveza ćemo staviti našoj Javnoj ustanovi i samim tim mislim da Budžetom to trebamo pratiti. Ovo što ste rekli za ovih 138.000,00 KM da nije baš malo, slažem se. Nije malo ako se uzme u obzir u kakvim uslovima radite i djelujete. Nije Ilijaš neko veliko tržište da bi se neki brendovi ovdje reklamirali. To se više radi putem multinacionalnih emitera i tako tih stvari. Ali, isto tako stoji uvaženi direktore ovo što je kolega Handžić govorio. Ne u smislu cenzure samog prenosa sjednica Općinskog vijeća. To vi prenesete onako kako jeste, ali izvještavanje sa istog, a tiče se Vašeg portala i tako tih stvari, uvijek se taj resurs stavlja u interes jednog političkog subjekta. O tim stvarima u budućnosti trebate malo više povesti računa. Nemojte da i njega bojimo jednom političkom bojom. To neka bude bukvalno emiter građana općine Ilijaš i da pristup u tom medijskom prostoru imaju podjednako svi. Ja evo apeliram na Vas i da u budućnosti to tako bude. Možete pogledati prošlu, pretprošlu ili neku ranije sjednicu, uvijek je u gro planu neko od vijećnika iz jedne političke stranke. U budućnosti o tim stvarima trebate voditi računa. Predsjedavajuća, ja ću zamoliti za pet minuta pauze kada iscrpimo diskusiju prije glasanja.

AKIF FAZLIĆ – općinski načelnik

Čini mi se da, kroz ove sve diskusije, ispadne da je stanje u našoj Javnoj ustanovi bolje nego kako je to prezentirano Izvještajem. Znači, kada to s ovog aspekta gledamo na to, da su opravdane kritike svih vijećnika prema onima koji su pravili Izvještaj. Menadžeri su uvijek u poziciji da naprave bolji Izvještaj nego što možda jeste stanje takvo. Znaju ga napraviti, dobro prezentiraju i Izvještaj dobro prođe. Dakle, zaista i direktoru i svima tamo, kada prave ove Izvještaje, nema ovdje molbe, to je odgovornost da se zaista Izvještaj napravi onako kako će pružiti meritornu sliku onima koji donose odluku u smislu je li on pozitivan ili negativan. Dakle, Izvještaj mora biti takav da se na osnovu njega može dati realna ocjena o radu. Moje zapažanje jeste da, onaj dio koji se odnosi na Izvještaj o radu i Finansijski izvještaj, na neki način nisu uredni, a možda Izvještaj o radu dijelom sadržinski i metodološki je, reći ću, bolji, nego ovaj Finansijski, jer kroz diskusiju vijećnika se pokazalo da dosta stavki nije analitički razrađeno i da kroz odgovore direktora, a to ne treba biti način. Dakle, sve one stavke koje se prezentiraju, kroz analitika trebaju biti pripremljene u samom Izvještaju kako bi se i prije same sjednice vijećnici mogli opredjeljivati u smislu diskusija i svega onoga što će diskutovati i kakve će stavove zauzimati. Ovo nama nije prvi put kada diskutujemo o Izvještaju javne ustanove da imamo određenih vrsta problema s aspekta i metodološkog i analitičkog pravljenja Izvještaja. Ovu sugestiju i stav Vijeća i mene kao načelnika, konačno prihvatite i da takve Izvještaje podnosite. Ovdje je dosta tema pokrenuto koje jesu dijelom vezane za Javnu ustanovu i zaista su sve to prevažne teme. Pitanje upravljanja stadionom kojeg ćemo izgraditi, pitanje organizacije sporta, pitanje Ilijaških dana su sve teme koje ja ne bih vezao za ovaj Izvještaj. Mi danas pričamo konkretno o Izvještaju JU KSC i Radio Ilijaš i da je ne opterećujemo onim što su popratne aktivnosti u čiju je organizaciju najviše uključena naša Javna ustanova. Takođe, ovdje se javno vidi da su fiksni troškovi ogromni kada je u pitanju ova institucija. Vidi se da je ova institucija racionalno organizovana i sa aspekta broja uposlenih i sa aspekta visine plaća i sa aspekta dosta ovih troškova, tako da preko 80% su ovi fiksni troškovi. Dakle, ostaje prostor od nekih 15% troškova koje treba detaljnije razraditi. Kroz sve diskusije, čini mi se da i poslije pitanja i odgovora imamo jasniju sliku kada gledamo na ovaj Izvještaj o radu. Znači, onu realnu, a ne ovu sliku sa papira i mislim da na bazi te slike i ovo što je direktor napominjao, mislim treba to napomenuti i uporediti rad svih vrsta ovih javnih ustanova i u okruženju i Kantonu Sarajevo, njihove pozicije, probleme i da je to, kada je u pitanju općina Ilijaš, na dosta solidnom nivou. Naravno, mnoge stvari treba popraviti i to jeste

zadatak menadžmenta i te stvari u smislu popravljivanja mogu se definirati i kroz Plan za 2019. godinu. Na bazi praktično ovoga svega, ja cijenim da ovaj Izvještaj zaista zavrđuje da bude podržan i usvojen evo i uz neke zaključke koji se mogu uputiti menadžmentu ove Javne ustanove da se one i dodatno provedu i da se uvedu kao neka stalna aktivnost koja će značiti popravljivanje nekih funkcija sa kojima nismo zadovoljni.

Na zahtjev vijećnika Alana Šeraka uslijedila je pauza od 12:10-12:15 h.

ALMA OMEROVIĆ – predsjedavajuća

Izjavila je da se izuzima od glasanja po ovoj tački dnevnog reda, te potom dala na glasanje Prijedlog Zaključka kojim se usvaja Izvještaj o radu i finansijskom poslovanju za 2018. godinu Javne ustanove "Kulturno-sportski centar i Radio Ilijaš".

Općinsko vijeće je većinom glasova usvojilo

## ZAKLJUČAK

### Član 1.

Usvaja se Izvještaj o radu i i finansijskom poslovanju Javne ustanove "Kulturno-sportski centar i Radio Ilijaš" za 2018. godinu, sa Izvještajem o Manifestaciji "Ilijaški dani 2018" i Izvještajm o održavanju i finansijskim efektima antenskog suta Karašnica.

### Član 2.

Ovaj Zaključak stupa na snagu danom donošenja.

### AD-4

Prijedlog Odluke o davanju saglasnosti na Plan rada Javne ustanove  
"Kulturno-sportski centar i Radio Ilijaš" za 2019. godinu

Predsjedavajuća se izuzela od glasanja po ovoj tački dnevnog reda.

Obzirom da diskutanata po ovoj tački dnevnog reda nije bilo, Općinsko vijeće je većinom glasova donijelo

Odluke o davanju saglasnosti na Plan rada Javne ustanove  
"Kulturno-sportski centar i Radio Ilijaš" za 2019. godinu

### AD-5

Prijedlog Odluke o naknadama za izdavanje izvoda iz Adresnog registra

NIZAMA MALIŠEVIĆ – šef katastra

U toku prošle godine provedene su aktivnosti na izradi softver Adresni registar i njegovoj implementaciji na području općine Ilijaš. Vi, kao općinski vijećnici, ste prošle godine usvojili dvije Odluke kojima smo odredili način obilježavanja naseljenih mjesta, ulica, kućnih brojeva na području općine Ilijaš i samu podjelu naseljenih mjesta na ulice i nazive ulica. Te Odluke su usvojene u martu i aprilu prošle godine na sjednicama Općinskog vijeća.

U januaru ove godine općinski načelnik i direktor Federalne geodetske uprave potpisali su sporazum o aktivnostima na daljnjoj implementaciji ovog softvera, odnosno Adresnog registra na terenu. Naša obaveza u ovom dijelu se odnosila na pripremu podataka gdje je općina Ilijaš izvršila iscrtavanje svih poligona ulica kroz ovaj softver Adresni registar, pripremila kućne brojeve. Dakle, uradilo se sve ono što je vezano za pripremne radnje za implementaciju samog projekta na terenu. Prije implementacije projekta na terenu, shodno ovom ugovoru koji je potpisao načelnik i direktor Federalne geodetske uprave, jedna od obaveza općine Ilijaš je da putem Općinskog vijeća usvoji o naknadama za izdavanje izvoda iz Adresnog registra koje će se koristiti u daljnjoj realizaciji ovog projekta. Ono što je bitno napomenuti jeste da se ova Odluka ne odnosi na samu implementaciju projekta na terenu. Dakle, obilježavanje kućnih brojeva, postavljanje naziva naseljenih mjesta, ulica, trgova na području općine Ilijaš izvršit će se u potpunosti besplatno za korisnike tih usluga. Ovo se odnosi na daljnje korištenje podataka ovog softvera. Dakle, postavljanjem kućnog broja na svaki stambeni objekat ili planiranu građevinsku parcelu kako je tamo određeno Odlukom, svaki korisnik, odnosno vlasnik tog kućnog broja dobit će i potvrdu o kućnom broju što će biti besplatno u implementaciji ovog projekta. Ovaj Prijedlog Odluke o naknadama je ustvari nešto što će se koristiti u daljnjem korištenju ovih podataka i u distribuciji ovih podataka u razmjeni sa različitim nivoima vlasti u različite svrhe za šta je potrebno.

MUHAMED HANDŽIĆ – vijećnik BPS-Sefer Halilović

Dakle, koliko sam shvatio, postojeći objekti biće numerisani besplatno i ulice i sve što postoji na općini Ilijaš. Naknadno ko bude gradio objekte ili eventualno prijavljivao ulice, da će se za to vršiti naplata. Da li je to tako?

NIZAMA MALIŠEVIĆ – šef katastra

Nije to tako. Dakle, kroz ovaj softver Adresnog registra moguće je izvršiti i postavljanje, odnosno tzv. rezervisanje kućnih brojeva tako da će sve trenutno planirane građevinske parcele dobiti svoj kućni broj koji je besplatan i koji će biti rezervisan kroz ovaj softver. Ovo se odnosi na slijedeće situacije: u roku od dvije godine potrebno je nekome da se izda lična karta i potrebna mu je potvrda o kućnom broju, e u tom slučaju će mu se naplatiti 5 KM za tu potvrdu o kućnom broju.

Diskutanata po ovoj tački dnevnog reda više nije bilo, pa je Općinsko vijeće jednoglasno donijelo

Odluku o naknadama za izdavanje izvoda iz Adresnog registra

AD-6

Nacrt Odluke o privremenom korištenju javnih površina na području Općine Ilijaš

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

ZAKLJUČAK

Član 1.

Utvrđuje se Nacrt Odluke o privremenom korištenju javnih površina na području Općine Ilijaš i stavlja se na javnu raspravu.

## Član 2.

Nacrt Odluke o privremenom korištenju javnih površina na području Općine Ilijaš stavlja se na javnu raspravu kako slijedi:

- objavom putem web stranice Općine Ilijaš ([www.ilijas.ba](http://www.ilijas.ba))
- javnim uvidom u maloj sali Općine Ilijaš (ul.126.Ilijaške brigade br.6, II sprat) svakim radnim danom u vremenu od 09:00 – 14:00 u periodu od 28.03.2019. - 15.04.2019. godine
- organiziranjem javne prezentacije u sali Općinskog vijeća na dan 16.04.2019. godine sa početkom u 14:00 sati.

U javnoj raspravi mogu učestvovati: građani Općine Ilijaš kao pojedinci, politički subjekti, mjesne zajednice, udruženja građana, javne ustanove, javna preduzeća, privrednici i druga zainteresirana fizička i pravna lica.

## Član 3.

Nakon provedene javne rasprave zainteresirani subjekti mogu dostaviti primjedbe, prijedloge prema Službi za saobraćaj, stambeno-komunalne poslove i građevine, najkasnije do 16.04.2019. godine do 16:00 sati.

## Član 4.

Ovaj Zaključak stupa na snagu danom donošenja.

### AD-7

Prijedlog Odluke o načinima i uslovima prodaje neizgrađenog građevinskog zemljišta  
(Alića Gaj)

ALMA OMEROVIĆ – predsjedavajuća

Predlagač je uložio amandman koji glasi:

"U članu 1. tačke 6. prijedloga Odluke o načinu i uslovima prodaje neizgrađenog građevinskog zemljišta navedena je parcela k.č.br.134/2, a treba da stoji k.č.br.134/3".

Diskutanata po ovoj tački dnevnog reda nije bilo, pa je Općinsko vijeće uz amandman koji se sastani dio prijedloga Odluke, jednoglasno donijelo

Odluku o načinima i uslovima prodaje neizgrađenog građevinskog zemljišta (Alića Gaj)

### AD-8

Prijedlog Rješenja iz imovinsko-pravne oblasti broj:06/1-31-407/19

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Rješenje iz imovinsko-pravne oblasti broj:06/1-31-407/19



AD-9

Informacija o dodjeli općinskih stipendija za učenike i studente  
u školskoj 2018/2019. godini

MUHAMED HANDŽIĆ – vijećnik BPS-Sefer Halilović

Čitajući ovu Informaciju primjetio sam da vršimo sistematsko raslojavanje u društvu, da kažem, siromašnih od imućnih. Ovdje sam vidio po dvoje djece od nekih ljudi na spisku za stipendije i vjerovatno su djeca odlikaši i jesu i to je, čini mi se, parametar kojim se rukovodila Komisija da dodjeli ili ne dodjeli stipendiju učenicima. Međutim, imamo mi učenika koliko god hoćete koji su dovoljni, dobri, vrlodobri koji ne mogu dobiti ove stipendije, a nužna im je. Mi tamo imamo jednu kategoriju koji su u stanju socijalne potrebe, a 90% je društva u stanju socijalne potrebe. O tome treba voditi računa. Insistiram, koliko je moguće i ovima iz nadležne službe koji slušaju, da se pokrene postupak promjene Pravilnika za dodjelu ovih stipendija pod hitno. Kolege koji imaju platu po 2.000,00 KM, uduplo, on i žena zaposleni, neću ih ovdje navoditi, i oboje djece dobilo stipendije. To je zaista jedna sramota društva, a onaj tamo koji ima petoro djece ni jedno nije dobilo stipendiju zato što u skromnim uslovima žive, jedva kraj s krajem stiže da ih školuje. Znači, dajte da nađemo neki kompromis, neko rješenje za ove učenike srednje klase kako bi unaprijedili, ništa drugo nego njihovo socijalno stanje.

Diskutanata po ovoj tački dnevnog reda više nije bilo, pa je Općinsko vijeće primilo k znanju

Informaciju o dodjeli općinskih stipendija za učenike i studente  
u školskoj 2018/2019. godini

Nakon što je iscrpljen dnevni red, predsjedavajuća Alma Omerović zaključila je dvadesetdevetu sjednicu OV-a Ilijaš u 12:30h.

Zapisničar:  
Maida Habibović

PREDSJEDAVAJUĆA  
OPĆINSKOG VIJEĆA ILIJAŠ

---

Alma Omerović, BA nov.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov@ilijas.ba](mailto:ov@ilijas.ba)  
certifikat:CRO20063Q

